



ATASSUT

UPA14/139-1

Knud Kristiansen

20.03.2014

Erngup nukinganik isumalluutunik innaallagissiornermut atorneqarnerat pillugu Inatsisartut inatsisissaannut nr. x (qaammat) 2013-imeersumut siunnersuut. (erngup nukinganut akuesissutunik tamakkiisunik tunngaveqarluni ingerlatsineq aamma isumaqatigiissusiornermi tunngavissanut il.il. inatsisitigut tunngaviusunik erseqqissaaneq).

(Avatangiisinut Pinngortitamullu Naalakkersuisoq)

Erngup nukinganik isumalluutunik innaallagissiornermut atorneqarnerat pillugu Inatsisartut inatsisissaannut siunnersuut ATASSUT-mit imaattumik oqaaseqarfigissavarput:

ATASSUT-mit kingumut erseqqissaatigissavarput Nunatsinni erngup nukinga nukissiuutitut atorlugu suliffeqarfissualiortoqarnissaa tapersersuinerput allanngornikuunngimmat.

Taamaattorli aamma peqqissaartumik isumatusaartumik isumaliutigilluagaasumillu suliat taamak annertutigisut ingerlanneqarnissaat pingaartilluinnarparput, pingaartumik inatsisitigut sinaakkutassat nunatsinnut annerpaamik iluaqutissiinissaat isumannaarniagassaavoq pingaaruteqarluinnartoq.

Matumani ATASSUT-mit miserraticissanngilarput assut eqqarsarnartoqartikkatsigu suliffeqarfissuit aallartikkumaartussat ukiut 80-it tikillugit nukissiuutunik pilersinneqarsimasunik atuisinnaanermut akuersissummik tunineqartalernissaat killiffigineqarpoq. ATASSUT-mit Naalakkersuisut qinnuigissavagut naatsukullammik ersarissumillu nassuiaateqaqqullugit sooq taamatut alloriartoqarnissaanut pisariaqartitsisoqalersimanersoq.

Inatsisimmi matuma ineriartortinneqarnerani piginnaatitsissutip sivitsoriartuinnarnera peqataaffigereerlugu matumani aamma taamak annertutigisumik sivitsorneqarsinnaaneraniq periarfissarsiorneq ilumut nunatsinnut iluaqutaasinnaassusianut sanilliullugu isumatusaarnerunersoq nalilersorluaqqissaarneqartariaqartoq isumaqarpugut.



Isumaqatigiissutitut pituttoraangatta tamatigut kingunissai sillimaffigisassat siumoortumik nalilersuinikkut isummersorfigisassavagut, tamanna aamma pisariaqarpoq qanorluunniit isumaqatigiissusiorfigineqartussat tatiginartigigaluarpata aammalu sulissutiginiagaat tutsuiginartigigaluarpata.

ATASSUT-mit kaammattuutigissavarput suliaq manna taamak annertutigisumik allannguinermik kinguneqartussaasoq peqqissaarulluinnarneqassasoq, pingaaruteqarpoq nalilersoqqissaassallugu aningaasaliiumasut piumassusaat annikillisanngikkaluarlugu nunatta annerpaamik iluaqutissinneqarnera inuiaqatigiit piumasaannut naleqqunnersoq.

Siunnersuutip siullermeerneqarnerani ATASSUT-mit tamakkiisumik isiginnittumik oqaaseqarnissarput toqqarparput, misissugassat nalilersugassallu imaannaanngitsut qulaajarneqaaqqaartariaqartut isumaqaratta, taamaattumik siunnersuut Inatsisartut Inuussutissarsiornermut Ataatsimiititaliaanut suliassanngortinneqassasoq inassutigissavarput.